

太上靈寶智慧觀身經

靜觀真人於思微中 觀身實相 深達智慧 了見四大 六種根
識 及五聚蔭 五印世法皆悉空寂 入無相門 所謂外想 內想
若生想 若滅想 了了照盡 無淨穢法 無生滅法 如是盡處 亦
無所盡 究皆是空 空竟升玄 何以故 內想者名境觀空 是空亦
空 空空亦空 空無分別空故 是無分別空 亦復皆空 空無二致
故言其盡 若善男女 照法空性 無起滅心 無憍慢心 無恐怖
心 無憎愛心 能於世間免種種苦 所謂生死別苦 鬼神害苦 官
私口舌苦 水火刀兵饑寒苦 皆悉免離 如是盡利益 非於一人
二人 必於無量無邊 無量數人 非一天 二天 無量無邊 無量
數天 其功德力 不可思議 是故此說 名為解脫 名利益義 名
無量義 名第一義 如是諸義 若書若寫 若讀若誦 若解說 是
為入智慧門 遊智慧室 坐智慧床 餐智慧食 得智慧真相之體
即於爾時說智慧頌曰
智慧起本無 朗朗照十方 結空峙玄霄 諸天挹流芳
其妙難思議 虛感真實通 有有有非有 無無無不無

太上靈寶智慧觀身經

清微藏書閣

智慧常觀身 學道之所先 渺渺入玄津 自然錄我神
天尊常擁護 魔王衛寶言 晃晃金剛軀 超超太上仙
智慧生戒根 真道戒為主 三寶由是興 高仙所崇受
汎此不死舟 倏忽濟大有 當此說戒時 諸天來稽首

太上靈寶智慧觀身經竟

天運辛卯年酉月正一天師清微弟子洪鼎堅羅大英恭錄彙編

鞠昕延複校